



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Meghalaya nung LP school 200 yanglushitsü atema Rs 100 crore lemozüksüogo

Myanmar mitkari Suu Kyi anema ochi mashi ken o benok



VOL. XIX NO. 41 (ADOK 41)

DIMAPUR

YANGTEPNÜ (THURSDAY)

YIMPOKSÜI (NOVEMBER) 18, 2021

₹ 5.00

IFAD Country Director-i Chief Secretary den ajurutepe



November 17, 2021 nü Kohima nung IFAD UN for Asia and Pacific Division nung Country Director Han Ulac Demirag-i Nagaland Chief Secretary J Alam, IAS den ajurutepe dang agiba noksa angur.

Dimapur, November 17, 2021 (TYO): November 17, 2021 nü IFAD UN for Asia and Pacific Division indang Country Director, Han Ulac Demirag-i Nagaland Chief Secretary, J Alam, IAS den ajurutepe.

"IFAD-i Nagaland nung aser talisa yimtsüung nung alirtem ajangzüksütsü mapa inyakba atema kanga pelar" ta Chief Secretary Alam-i ashi.

Nagaland nung IFAD indang

mapatong ajanga aluyimertemi inyakyim tasen aser tajungtem angazüksü imlar, ta paisa ashi.

Nagaland nung temo aketba ali tajung aser ali rongsen talubosa lir. Anungji IFAD-i maneni aluyimba tsütsü nübortem yaritsü imlar, ta J Alam-i metetdaksü.

Nagaland sorkari mapatong inyaksü nangzükba aser akokba tashi nung yaritepeba atema kanga pelar, ta Han Ulac Demirag-ia ashi.

NCD-i ULB nung interim member shimba atema senden ayonger

Dimapur, November 17, 2021 (TYO): Naga Council Dimapur (NCD)-i Dimapur nung amenoka aliba civil society tem den Urban Local Body (ULB) nung interim member shimoktsüba indang senden ka amentsü jatepogo.

Sendenji November 20, 2021 anepdang 11:00 nung NCD Conference Hall nung amentsü, ta

Tongti Tezülur, Thsapongkyu Sangtam-i sangdong ka nung ashi.

Iba senden nung NCD Councilor ajak aser GB's (Sadar) Union, Dimapur Chamber of Commerce & Industry, BAN Dimapur Unit, DDCF, NWHD aser DNSU ketdangpur ajak arua adentsü mepishir, ta paisa metetdaksü.

GST items nung tax mesüra fees noktanga atema pelar: CNCCI

Dimapur, November 17, 2021 (TYO): Nagaland nung Urban Local Bodies (ULBs) ajanga GST items nung tax mesüra fees agiba ajak noktanger ta Department of Municipal Affairs-i metetdaksüba atema kanga pelar ta Confederation of Nagaland Chamber of Commerce and Industry (CNCCI)-i metetdaksüogo.

GST items nung tax agiba anenba ajanga shishilebartem yaritsü aser talirtem kanga ajangzüksütsü, ta CNCCI-i ashi.

Nübertem tia metetba sorkar ka ajanga shishilebabaren tajungba akümtsü aser Nagaland state rongsenketzung tsütsü renloktsü,

ta parnokisa ashi.

CNCCI-isa Deputy Chief Minister Y. Patton, Urban Development Advisor Dr. Nicky Kire, Chief Secretary, DGP, Addl. Finance Commissioner, Principal Secretary Urban Development, Home Commissioner aser tongti ketdangsur ajak dang pelaba metetdaksür, ta Media Affairs-i ashi.

CNCCI-isa 12 District Chamber of Commerce and Industry dang tax aser collection noktanga amaji shishilebabaren nunga jenjang ajemtsü aser talirtem ajangzüksütsü atema tetuyuba agütsüogo.

Tanü nungi ABAM lokti senden tenzükur

Impur, Nov.17 (TYO) : Impur nung Ao Baptist Arogo Mungdang 125 buba küm tatem lokti senden November 18 nungi 19, 2021 tashi alitsü asoshi sentong renema lir.

Iba lokti senden mezüung aonung ABAM tir Dr.I.Lolen Imcheni tayongzükba o ashitsü aser Rev.C.Temjeni tajungshi o jembitsü aser Executive Secretary osang Rev.Dr.Mar Pongeneri agütsütsü. Iba kasa sentong mapang Ao limai Khristan yimsü tajung arur küm 150 abensaba mong Sesqui Centenary jeli sangdong video tatsüka ABAM youtube channel

ajanga sangdongtsü.

Tanünep lokti o lemtepe sentong metenzük dang, Nagaland nung election merüka agitettsü atema lokti sarasadem mapang ka agütsü. Iba lokti senden tatembangba sentong nung Tsüngrem o ABAM Literature & Education Secretary, T.Apok Jamiri jembitsü.

ABAM kübok aliba arogo shia nem voting members nütsüung yongsük yari yamai agüja lir : Arogo züngsem 30 nungi 500 tashi pur nisung 5; 501 nungi 2000 tashi pur nisung 7 aser 2001 nungi tema pur arogo shia nisung 9.

RIIN ajanga non-Naga inhabitants ajangzüksü: CM Rio

Kohima, November 17, 2021 (TYO): Nagaland nung Register of Indigenous Inhabitants of Nagaland (RIIN) ajanga Gorkha/Nepali nung dena non-Naga indigenous inhabitants jenjang tajungba akümtsü ta Nagaland Chief Minister Neiphiu Rio-i ashi.

Chandmari nung Gorkha Public Panchayat Kohima (GPPK) indang Multi-utility Hall lapoktsüdang pai iba osang metetdaksü.

"Linük aser yimti aika nung Gorkha/Nepali nung lir aser Nagaland nungbo parnok World War-II matongdang nungi liasü. Parnoki medemertem yimtetogo aser T Khel, Kohima village den tesentaktep tajung lir. T Khel-i Gorkha/Nepali nung adopt asüba aser kümzüka ayubaji Angami nung aser Naga nung tenung nung lir" ta Rio-i ashi.

"Gorkha aser Naga nung kanga mesükteper aser iba jagi zübazüba medemer yimteteter. Asenok maneni yamai adianu ama liyonga aotsü" ta paisa shisem.

Kohima, Dimapur, Naga nung Kuki, Garo, Kachari aser Mikhir (Karbi) nung recognized non-Naga tribes lir aser Nagaland nung nenok indang yimtem lir. Nenok Indian Independence aser Nagaland statehood mangudang nungi arua aliba lir. Sorkari asenok ajak ajungtsü atema mapa inyaksü" ta paisa nangzük.

"Sorkari parnok permanent citizens kümdaktsüba dang masü saka parnok taküm jenjang tajung alitsü atema mapa inyaksü" ta paisa ashi.

State sorkari Register of Indigenous Inhabitants of Nagaland (RIIN) yanglur aser iba nung Gorkha/Nepali nung adentsü kechiyong nung Indigenous Non-Naga Local Residents of Nagaland ta aigzüka lir, ta CM Rio-i metetdaksü.

"Nagaland nung Kuki, Garo, Kachari aser Mikhir (Karbi) nung recognized non-Naga tribes lir aser Nagaland nung nenok indang yimtem lir. Nenok Indian Independence aser Nagaland statehood mangudang nungi arua aliba lir. Sorkari asenok ajak ajungtsü atema mapa inyaksü" ta paisa nangzük.

"World War-II mapang non-

Naga nung Kuki, Garo, Kachari aser Mikhir (Karbi) nung recognized non-Naga tribes lir aser Nagaland nung nenok indang yimtem lir. Nenok Indian Independence aser Nagaland statehood mangudang nungi arua aliba lir. Sorkari asenok ajak ajungtsü atema mapa inyaksü" ta paisa nangzük.

Chandmari nung aliba tekülem ki ya "Heritage of the State" jaloktsütsü atema Art and Culture nem tetuyuba agütsütsü, ta paisa nangzük.

"Multi-Utility Hall yangluba ya lokti sentongtem agütsü atema yangluba lir. Iba Hall ya ajaki amshitetsü aser jenjang dalang asütsü" ta GPPK president Santu Thapa-i ashi.

Kohima aser temeket nung Gorkha nung arua aliba indang osang lemsatepdang "Nagaland sorkari 1974 küm Gazette Notification agütsüba nung kibong 166 liasü. December 31, 1940 matongdang Gorkha nung mezüung aliba tesemtemji- Daklane, Chotobosti, Hospital Colony, Piphema, Zubza, Aradhura aser Chandmari liasü" ta Santu Thapa-i metetdaksü.

Nagaland nung 'Export Facilitation Cell' lapokogo

Dimapur, November 17, 2021 (TYO): Bodbarnü Capital Convention Centre, Kohima nung Chief Minister, Neiphiu Rio-i 'Export Facilitation Cell' lapoktsüogo.

'Export Facilitation Cell' ya Indian Institute of Foreign Trade ajanga lapoker aser North Eastern Council (NEC)-ia teyari agütsür. Tanü Vice Chancellor IIFT, Dr Manoj Pant lia CM Rio-i iba Cell lapoktsü.

"Indian Institution of Foreign Trade ya Nagaland atema dang masü saka Northeast state ajunga atema import aser export sector tenzükba lir. Nagaland nung export facilitation cell lapokba ya entrepreneur tem ajungmesotsü aser yaritsü atema lir" ta Chief Minister,

Neiphiu Rio-i ashi.

"Asenok ya producing society ka masü saka consumer society lir anungji sorkari lanur aser entrepreneur tem ajungmesotsüsa akümer" ta paisa ashi.

"Naga nungeri politics indang dang jembiba anentsüla aser asen rongsenketzung nunga temolung agütsütsüla. Asenok ket nung ali rongsen tajung aika lir saka asenoki itemji agiteta magira odang alitsü" ta CM Rio-i metetdaksü.

"Covid wara ajanga Nagaland ama state tila nunga pei sasa züsenteta alitsü tangatetba adokdaksüogo aser pei sasa züsenteta melitetra import mesüra export kecha mali. State sorkari department den külemi Agri and Allied

sector nung Naga model tenzükogo" ta paisa metetdaksü.

"Lanur aika ket nung kulikakettem lir saka mongin makümba ajanga mapa mangur anungji lanurtemi temolung agütsütsüla" ta Chief Minister-isa ayongzük. Iba sentong nung CEO, IDAN, Alemtemshi Jamir-i tesentepertem pelaa agizükba o jembidang "Nagaland nung export cell lapokba ya Nagaland state aser nübertem export aser import sector nung mera tulu ka agiba lir" ta ashi.

Sentong nungsa Vice Chancellor, Dr Manoj Pant, Professor CTFL Nitin Seth aser Secretary NEC, Moses Chalai nungeri export facilitation cell indang osang lemsatepe.

AR jawan Swargiary'er kibong nem Rs 50 lakh agütsü

Guwahati, November 17, 2021 (Agencies): Bodbarnü Assam Chief Minister Dr Himanta Biswa Sarma-i Assam Rifles jawan asür Suman Swargiary'er semdangogo.

CM Sarma-i Baksa district kübok Thekerakuchi Kanhibari yim nung asür Suman'er kinungertem den ajurutepe aser Rs 50 lakh indang cheque agütsü.

"Kiralongrartem ket nung jawan (sepai) ka taküm samara, state sorkar Rs 50 lakh teyari agütsütsü lemteta lir. Tanü ni

linük atema taküm bendanga agütsür kinungertem den senotsü teyari tila ka agütsütsü mapang anguba atema pelar" ta Sarma-i ashi.

"Iba yim nung alirtemi gari lenmang junga yangludaktsünür aser Suman Swargiary tenung jalokdaksünür. BTR tanishir Pramod Boro den jembitepe sülen state sorkari gari lenmang yanglushitsü aser Suman Swargiary tenung jaloktsütsü lemtetogo" ta paisa metetdaksü.

Assam CM-isa asür kibong

dang sorkari teyari agütsütsü aser pa azüngba school nung stadium ka yanglutsü nangzük.

Honibarnü Manipur kübok Churachandpur district nung Suman Swargiary khaset. Iba lendong nung 46 Assam Rifles commanding officer Col. Viplav Tripathi den pa kinungtsü Anuja, jabaso Abeer aser sepai 4 tepset.

November 15, 2021 nü Suman Swargiary den asüpila sentep sentong agia liasü. Suman tebu Kanak Swargiary-a 2007 küm kiralongrartem tepset.

Yingli College Longleng indang teburtem hostel semzükogo



Dimapur, Yimpoksüi/Nov. 17 (TYO): Yingli College, Longleng indang teburtem hostel tasenba November 15, 2021 nü Director, Higher Education, Dr. Apeni Lotha-i semzükja liasü.

Iba hostel ya Rashtriya Ucchar Shiksha Abhiyan (National Higher Education Mission) kübok Department of Higher Education, Nagaland ajanga yanglua liasü.

State nung higher education tali ulushitsü atema hostel ya tajungtiba nung amshitsü imlar, ta Dr. Apeni Lotha-i ashi.

Lai College indang kaketshir, tesayur, non-teaching staff aser ali tenlarthem dang district nung higher education temaba jenjangi ajungkettsü ajungshia liasü.

Laisa Principal nem college accreditation atema sen lakh ka aser iba sentong takok ngua agütsü atema sen 30,000 amokja liasü.

College ajanga campus aser ki-o-jen junga anepaluba atema lai pelaba lemsatapa liasü. Aruya aliba NAAC accreditation tajungtiba inyaksü imlar, ta lai shia liasü.

Iba sentong nung Joint Director, Higher Education & State Project Director, Rashtriya Ucchar Shiksha Abhiyan (RUSA), Menuokholie Kire ajanga college nung RUSA project inyakba indang jembia liasü.

Longleng district nung nüburttem atema iba hostel ya

Covid Quarantine Centre ama amshia liasü, ta pai ashi.

Chairman, Bhummy Village Council, S. Angam Phom ajanga o tatsüka jembia liasü aser kaketshirtemi sobaliba tsüngsang aser ken agi shilem agia liasü.

Principal, Yingli College, Dr. T. Temsu Imti ajanga tarur pela agizükba o jembia aser Vice Principal, Dr. B. Henshet Phom ajanga melepzüng o jembia liasü.

Sentong nung Asst. Prof., Dr. Vizolenuo Sophie menden liasü, Pastor, Bhummy Baptist Church, Rev. N. Mongmei Phom ajanga iba hostel meshiteta sarasademtsü aser Yingli College indang Evangelical Union ajanga college anthem tena liasü.

Kohima nung Single Window indang workshop agi

Dimapur, Yimpoksüi/Nov. 17 (TYO): Invest India & Department of Industries & Commerce ajanga Directorate of Industries & Commerce indang conference hall nung Single Window System indang workshop ka November 17, 2021 nü agia liasü.

Iba sentong nung Director, Industries & Commerce, K. Hokishe Assumi-i ashiba agi, mainland India den kasa Nagaland aintsü nungdaker aser state main tashi India maintsü.

"Single window system" ya Nagaland ama state ka atema teyari tulu lir, kong service aika digitalized masü lir aser senotsü indoker temi timtem majurutsü aser mapang meindoktsü, ta pai

ashi. Director-i iba sentong nung alirthem dang mapa nendaka agütsür inyaksü ajungshia liasü. Assumi-i Invest India team dang sentong balala inyakba atema pelaba lemsatap aser tarutsü nung Nagaland nung single window kübok kulizüng aser kuli kaketshir nungdaksü, ta ashi.

Chief Technology Officer, Invest India, Aditya Sharma-i ashiba agi, Single Window System ya osang ajak line kati aiddaksütsü atema frame work ka lir aser state 14 nung single window system lir.

Invest India kübok Nagaland ya online information aliba state 15 buba alitsü. 2020 küm

February ita nung Finance Ministry, Government of India ajanga online platform alitsü renema liasü, koba agi Centre aser state indang approval ajak single window system kübok inyaksü.

Invest India yagi team ka ama inyakner aser timtem angateta tekeraba nung maparen tenzüktsü merangtsü, ta Sharma-i ashi.

Osangtsüsang ajak online nung agütsütsü aser maparen balala inyakba nung temolung lemdaksütsü nükjindong nung iba sentong tenzük, ta pai ashi.

Iba sentong nung Joint Director, Er. Lipongse Thongstar menden liasü aser Deputy Director, Yawelie Boudi ajanga melepzüng o jembia liasü

COVID-19 Nagaland: 6 dak putet & 9 taneptsü angu

Kohima, November 17, 2021 (TYO): Nagaland nung Bodbarnü nisung 6 dak COVID-19 aliba putet aser 9 taneptsü angu.

"Tanü nisung 6 dak COVID-19 aliba putet. Parnokji Dimapur nung 3 aser Kohima, Mokokchung o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüngda COVID-19 puteta alir nisung 9 taneptsü angu. Parnokji Mon

nung 4, Mokokchung nung 3 aser Dimapur o Kiphire nung kaka (1) lir" ta pai ashi.

Nisung 32,024 rongnungi 30,129 taneptsü nguogo aser ibaji taneptsü angur 94.08% lir, ta Dr Kikon-isa ashi.

Tang nisung 144 anepaludar saka parnok 116 dakbo shirangba yimya kecha mali" ta paisa shisem.

"Mongulbar tashi nung nisung 720,486 nem COVID-19 vaccine indang dose 12,44,670 agütsüogo" ta State Immunization Officer, Dr Ritu

Thurr-ia ashi.

"Vaccine agirtemji frontline workers 60,975, healthcare workers 15,999, arishi küm 45 ser tempur 204,381 aser arishi küm 18 nungi 44 tsüngda alir 439,131 lir" ta paisa shisem.

"Vaccine agirtem rongnungi nisung 524,184-i dose anaprong agiogo. Parnokji frontline workers 48,202, healthcare workers 13,462, arishi küm 45 ser tempur 167,610 aser arishi küm 18 nungi 44 tsüngda alir 294,910 lir" ta Dr Thurr-isa metetdaksü.



All India Congress Committee (AICC) aser Nagaland Pradesh Congress Committee (NPCC) totuyuba nung ajemdaker Kohima District Congress Committee (KDCC) ajanga Congress Bhavan Kohima nung November 17, 2021 nü Jan Jagran Abhiyan mesüra People's Awareness Programme tenzükba liasü. Linük nung osettsüset balala nung jenjang tali temlokba anema iba sentong ya ayongzükba liasü, ta KDCC tir, Kevi Vizo-i ashi.

Hornbill Festival 2021 atema tanü senden amentsü

Dimapur, Yimpoksüi/Nov. 17 (TYO): Hornbill Festival, 2021 renemba jenjang asadangtsü atema sendaktepa aliba department den senden ka November 18, 2021 anepdang 9:00 ako nungi

tenzükba Bamboo Hall, Naga Heritage Village, Kisama nung amentsü, ta sangdong ka ajanga ashi.

Iba dak sendaka alirthem ajak sentong nung adentsü mepishir, ta sangdong ajangasa ashi.

C-Edge College nung NCC Raising Day munga liasü



Dimapur, Yimpoksüi/Nov. 17 (TYO): C-Edge College nung November 17, 2021 nü National Cadet Corps (NCC) indang Raising Day munga liasü.

Iba sentong nung NCC Unit tasen ya taoba mapang Kohima Science College indang Vice Principal aser CEC IQAC External Member Yanger Longkumer-i semzükja liasü.

Kaketshirtem yimya tajung nung anitetsü, khuret angateta linük meimba senso kumdaksütsü atema sapang agütsütsü nükjindong nung iba unit ya amenoka liasü.

NCC CEC ya kaketshir rongnungi tebur 20 aser tetsür 16 senteper Cadet 36 agi tentet, kong Ikaito V. Zhimomi ya CTO, NCC CEC alitsü. College nem NCC Unit CEC agütsüba atema college-i 25Nagaland Battalion NCC, Mokokchung dang pelaba lemsatapa liasü

College indang Academic Dean & IQAC Coordinator, Wapanginla Ao ajanga tajungshi

o jembiba mapang NCC CEC tentetba ya college asoshi tongtipang alizüng ka tongtetba alitsü ta ashi aser mezüng batch nem tenüngsang agütsü.

NCC ya linük nung tongtipang telok ka lir, koba 'Unity & Discipline' tangatetba nung nokdaka lir aser NCC züngsemtsü ya mapa temela ka masü, ta lai ashi.

Lai Cadet tem dang arok tangatetba, yimya tajung, linük telungjem aser anibelem mesasai tenzüktsü ajungshia liasü.

Iba sentong nung BA III semester nungi Sotsula Kussun-i temeja ken ka aten aser Lito Zhimomi, Asst. Professor of English ajanga sentong tembanga sarasadema liasü.

NCC CEC ajanga March Past sayua liasü aser sentong nung college Principal Dr. Chubatola Aier, Canaan Hands züngsem Tangit, Faculty, Staff aser kaketshirtem dena liasü.

NSCN/GPRN ajanga asükhu lemsatap

Dimapur, Yimpoksüi/Nov. 17 (TYO): NSCN/GPRN indang Razou Peyu, Vareimi Kazingmei anojungi November 13, 2021 nü asüba asoshi Government of the People's Republic of Nagalim (GPRN) ajanga mangyim-jashi lemsataper, ta NSCN/GPRN indang MIP sangdong ka ajanga ashi.

Pa ya Wung Tangkhul Region (WTR) kübok Lunghar yimtsüng nungi lir aser Naga linük tenzükba wadang nung December 14, 2002 nung tenüng zülüoka liasü.

Ano maneni November 17, 2021 nü anojungi General Headquarters (GHq), Naga Army indang 2nd Lieutenant Kothilran Dangshawa asüba atema mang ayimer, ta GPRN sangdong ajanga ashi.

Asür Dangshawa ya Khurmi Region kübok Machi yimtsüng nungi lir. Pa ya Naga linük tenzükba mapa nung 2015 küm August 20 nü tenüng zülüoka liasü.

Naga linük asoshi pai

tenzükba temaitsü Naga Army indang Adjutant General (AG) ajanga pa nem November 17, 2021 nü Lieutenant (posthumously) rank agütsür.

Tenaprongi tasünü tashi linük meimba molungsentsü nung Naga linük tenzükba liasü. Tena asüba ajanga tawa adokba kanga jangja metettsü aser iba tawa asüngtsü tasak asütsü. Parnoki Naga nunger asoshi anibelem mesasai inyakba atema parnok tenüng Naga nunger otsü nung teti amshitsü aser mapang ajak nung bilemtettsü.

NSCN/GPRN ajanga Asür Vareimi Kazingmei aser Asür Lieutenant Kothilran Dangshawa kinungertem den asükhu lemsataper.

Parnoki yutsür aoba kinunger adianutem nem Tulusang Tsüngremi tashi tasen agüjang, ta sarasademtsür.

Parnok tanüla teti tatem maka tesunep nung anisüngzükjangma, ta sangdong ajanga ashi.

Meghalaya nung LP school 200 yanglushitsü atema Rs 100 crore lezmüksüögo



Mendipathar College küm 50 ajungba nungo kaket sayatsüba noksa nung ngur.

Shillong, November 17, 2021 (Agencies): Meghalaya state sorkari sorkar LP school 200 shi ka nung infrastructure renlokdahtsütsü atema Rs 100 crore lezmüksüögo, ta chief minister Conrad K Sangma-i ashi.

Meghalaya kübok North Garo Hills nung Mendipathar College küm 50 ajungba benjung nung Chief minister Sangma-i iba osang metetdaksü.

North Garo Hills nung college ka dang alibaji Mendipathar College lir aser sorkari akokba tashi teyari agütsütsü ta Meghalaya CM-i ashi,

Iba sentong nung education minister Lahkmen Rymbui, deputy Speaker Timothy D Shira, aser MLA Rupert Momin o MLA Pongseng Marak nung aden,

"MDA sorkari state nung education sector tajungba kümdakhtsütsü nangzüka lir.

2018 election matongdang ni nübortem dang sorkarakümtsü maongka ngura education nung temolung agütsütsü nangzüka liasü" ta CM Conrad-isa ashi.

"Nangzüka ama onoki sorkar akümba sülen State Education Policy renem aser education sector tajungba kümdakhtsütsü asoshi mapa inyaka arur" ta paisa ashi.

"State sorkari küm shia education sector atema Rs 2000 crore tema endoker saka iba jagi meperir" ta Conrad-isa shisem.

Taküm asoshi sorkar LP school 200 shi ka yanglushitsü atema Rs 100 crore lezmüksüögo. Ano sorkari school talila 300 shi jangjatsü meranger aser iba sülen sen lezmüksütsü, ta paisa metetdaksü.

"Taruba küm pungu tsüingda kaketshir nütsüing yongsük lakh 4 shi akümtsü aser college tem nung menden 45000 dang lir" ta Meghalaya CM-isa ashi.

Sorkari iba tebilemstü meteta lir aser iba ajanga college tem nung menden talila kümdakhtsütsü meranger, ta paisa ashi.

Meghalaya sorkari "People's College" scheme kübok state nung tawa tu college 9 yaritsü tenzükögo aser kaketshirtemi higher education angutsü atema Community College aser Model College inyakyim tenzükögo. Asenoki college talila lapoktsüla, ta Conrad-isa metetdaksü.

"MDA sorkari tesayurtem regularise asütsü atema mapa inyaker aser taküm küm tesayur 1300 nem permanent posts agütsüögo" ta education minister Lahkmen Rymbui-ia ashi.

Külen, kaketshirtem atema scholarships Rs 15000 tutsüögo aser merit scholarship ita nung Rs 60 agüja aruba tangbo ita nung Rs 600 agütsür" ta pai metetdaksü.

Mizoram nung journalists atema pension scheme tenzüksütsü

Aizawl, November 17, 2021 (Agencies): Mizoram sorkari state nung journalists atema pension scheme ka tenzüksütsü meranger ta Minister kati ashi.

Mizoram Journalists' Association (MJA)-i Aizawl nung 'National Press Day' ayonga amongdang Information and Public Relations minister Lalruatkima-i iba osang metetdaksü.

"Osangbenertem ya democracy nung tongshi ka lir aser iba jagi sorkari parnok asoshi mapa temolung agütsür" ta Lalruatkima-i ashi.

"Journalist nem pension agütsütsü atema mapa inyaker. Telok kati pension scheme shisadanga repringdar" ta paisa shisem.

COVID-19 wara ajanga mapang shitak nung iba mapa meinyaktet, ta paisa ashi.

"Osangbenertem ajanga

asenoki osang meteter anung nenoki maneni public indang tenarong ama inyaksü ayongzüker" ta Mizo National Front (MNF) minister-isa ashi.

"Journalists-i democracy ka nung tongti shilem agir aser sorkar tajungba kümdakhtsür. Media nisungtemi kuli tejangja maliba osang aser külen tsütsü ashiba osangtem meproksüla kechiyong item ajanga nübor mashileni anitsü akok" ta minister Lalruatkima-isa ashi.



Manipur nung Assam Rifles kübok Keithelmanbi Battalion-i telungpur telok ana People's Liberation Army (PLA) aser Kangleipak Communist Party (KCP) zungsem kaka puogo. Osang tejangja kar nung ajemdaker Mongulbarnü Assam Rifles den Manipur Police Bishnupur aser Imphal East district tem mita aodang tena apu aser Nambol o Irilbung Police Station ket nung agütsüögo.

Office of the
AO SENDEN LITERATURE BOARD (ASLB)
(Arok Osep Yanglushiba Luden)
MOKOKCHUNG – 798 601
NAGALAND
Reg. No. HOME / SRC-6703

Ref. No. ASLB/AOYC-1/A (I-IV) 2020-21 Date: 17-11-2021

SANGDONG

Taoba Mongputeni 2, 2021 anogo, Arok Osep (Ao Dictionary) yanglushiba Luden mezüngbuba senden mena lemtetba No.1(i-iv). Dated, Mongputeni 2, 2021, Ao Senden Tongror Luden dangi yoka parnoki asadanga jembir melaba lemtet No. AS/Gen-6/2021/781, Dated, 02/11/21 nung amendaker iba Arok Osep yanglushitsü lemtetogo.

Anungji iba Osep (Dictionary) nung enoktsü atema nüburtem rongnung temulungger ajak nungi Ao o ojang aser tetezü bendentsü sangdonger. Shirnokisa iba maparen nung yaritepnür parnoki teküboklen agüja aliba inyakyim tarensen nung ajemdaker shilem agitsü akok.

- Ojang ajak computer nung type sür (hard & soft copy) agütsütsü mesüra ASLB. E-mail (aosendenliterature@gmail.com) nung yoktsü akok.
- Shibai yokdir pei tenüing, taliba tesem aser Mobile number tejangja dena yoktsüla.
- Ojang kwi yokdir yokaka tetezü tejangja enoktsütsüla.
- Nai agütsüba ojangtemji Arok Osep Yanglushiba Luden-i asadanger nungdakbatem agiteta enoktsü aser tanüingbatem (ASLB Archive nung) tarutsü asoshi rizünga yutsütsü.
- Shilem agirtem ajaki Yimpoktsüi, 2021-Rongchii, 2022 tashi nung ASLB ket tongtsütsü metetdaksür.

Nüburtem ajak yaritepnü nung iba Arok Osep terenemjem ta mesüaka, akok tashi tajungtiba inyaksü tebilemba nung iba maparen tenzüker. Anungji nübur ajaki mulungsoa iba maparen nung yariteptsü imlaa atar.

**Nübur tenzüka mapa nung,
Sd/-
S. Wati Ozüküm
Luden Tayonger**

Karbi Anglong nung mozü shibelener dak injang khaloktsü

Bokajan, November 17, 2021 (Agencies): Assam kübok East Karbi Anglong district nung Mongulbar aonung mozü shibelener ka dak police-i injang khaloktsü.

Iba nisung yagi Bokajan nung police ket nungi jena aotsü merang aser idangji injang khaloktsü.

Mozü shibelener tem senzüba osang angazükba sülen Karbi Anglong police-i Bokajan kübok Matipul tesem nung Scooty (AS 09H 4234) ka sota repring. Iba scooty nung sapon pongdang 150 bena liasü aser idakji heroin seret 1.77 shi enoka liasü.

Iba dak sendakba nung police-i Bimol Tassa (23) aser Saddam Hussain (26) na apu. Tena ket nung apuba mozüji

black market nung sen crore 12 tema jengang lir.

Tenati Nagaland kübok Dimapur nung mozüji alizük aser Golaghat district kübok Naoghat nung agütsütsüba liasü ta police dang nangzükögo.

Tena apuba tesem nungi police station-i anir aodang Saddam Hussain temang tera mejungi aküm aser police indang gari nungi kimai alutsü merang.

Iba jagi police-i gari anen saka Saddam-i gari nungi aluli police nungdoker jena aotsü merang, ta ketdangsür kati ashi.

Idangji police-i Saddam dak injang khaloktsüdang pa tetsüing nung khashi. Pa Bokajan CHC-i anir ao anepalutsü aser tang tajungba kümogo ta osang angazükter.

Assam nung kaketshir 13,770-i HSLC & AHM exams nung takok angu

Gwahati, November 17, 2021 (Agencies): Board of Secondary Education Assam (SEBA)-i Assam High School Leaving Certificate (HSLC) aser Assam High Madrasa (AHM) special examinations 2021 results metetdaksüögo.

Special HSLC aser AHM tatidangtem ya October 1 nungi 11, 2021 tashi agia liasü.

Kaketshir 22,836-i tatidang agütsütsü tenüing agütsüba

nungi parnok 19,305-i tatidang agüja liasü.

Kaketshir 18,878 rongnungi kaketshir 13,421-i HSLC exams nung takok nguogo aser kaketshir 349-i AHM examinations nung takok angu.

COVID 19 wara ajanga taküm SEBA-i board exams magitsü lemteta liasü. Ajisüaka, results nung temolung masüba kaketshirtem atema 'special exam' ka agitsü lemteta agiogo.

Assam Police ketdangsür ka süpokrem agidang apu

Guwahati, November 17, 2021 (Agencies): Bodbarnü Directorate of Vigilance & Anti-Corruption (DVAC), Assam ketdangsürtemi Assam Police ketdangsür ka apu.

Assam Police ketdangsüri süpokrem meshia agiba mapang DVAC ketdangsürtemi pa apu.

Iba nisung ya Sudhanya Bhattacharjee ta jangjaogo aser pa ya Hailakandi police station nung sub-inspector inyaka liasü.

Iba osang ya Special DGP (Law & Order), Director V&AC & Chief Anti-Rhino Poaching Task Force, Assam

GP Singh-ia jangjatsüögo. "Hailakandi police station nung sub-inspector Sudhanya Bhattacharjee-i Rs 5,000 süpokrem meshidang apu" ta IPS ketdangsür Singh-i metetdaksü.

Ken o benokba nung ajemdaker Directorate of Vigilance & Anti-Corruption (DVAC), Assam-i mita aodang police sub-inspector apu.

Iba ajanga Assam nung ochimashiba police ketdangsür aikati nübortem dang süpokrem meshia agiba inyakyim jungkai adoka sayur.



TIR YIMYIM YIMOBILEM (EDITORIAL)

DIMAPUR YANGTEPNÜ, YIMPOKSÜI (NOVEMBER) 18, 2021

Sen apudak akatsüla

Nagaland nung peisasa tajangzük akaba mapa tenzüka inyakner lanur aika lir, saka mapa tenzüksü sen makaba agi metenzüktet lanur aika amajok nung maong tajung süitemdagi. Aji oda, tanü Nagaland asoshi takoksa tulutibaji lanurtem mapa meinyak kazüdokba tashi aser mapangji asütsü. Atangji, khen bilemstübo Nagaland nung mapa inyaker meinyakma lir, ibayongji tangar bendangertem Nagaland-i ayangi arur. Item bendanger ayangertem jagi anogo sen noklang trokrok - tenetnet agia asenok meyong kiojen yanglutsür aser asenok nungdakba ajak angutsüsa dokan tapu balala lapoka shishilembaba mapa inyaker. Item mapa inyakertem agi mata asenok rakteper aser külen asenokbo mapa maka amai kecha meinyak alima nung chiyonga amonger. Ajisüaka, kodang asenoki Naga nunger lanurtem mapa meinyak kazütepba tebilemstü ya telong tonga iagi repringandir, parnok aika azümasenba agia masü aser mapa mangu memetetba agia masü saka sen makaba agi mapa metenzüktet timtemba purtem asütsü. Atangji, nisung shinga tamasyongi kar maso saka tilaka nungi tenzüka tuluka küma takar akümba purtem alima sünga lir. Aji oda, asenok lanurtema tamasyongi tuluka nung mawashii peisasa inyaktetba mapa tilaka tenzüka inyaksü bilemstü nungdaker. Asenok asoshi cement amshiba kiojen yangluba nungi tenzüker tsüngsem meyuba, ku mejepba aser süngo aser amtsük ayokba mapatem ajak ya tasen lir, anungji angazüksüla. Ano, süng long aser yin amshia inyaksüba mapatem aika lir, saka itemjia teimbaka asenok asoshi mapa tasen asütsü. Ano, tanübo computer ajanga mopong nung dang tongtepratepa inyakba putu asünungji, online ajanga inyaksüla mapa tasen aika lir. Item ajakji asenok lanurtemi angazüktetsü aser inyaktetsü. Anungji, parnoki item mapatemji tenzüktetsüsa senotsü apudak akatsü nungdaker. Joko, government mapa nungbo lanurtem aika manioktetsü aser lanurtem rongnunga aikati government mapabo mejangrai kümogo, kechiyong government mapa inyakba ajanga parnok dak aketba tashi aser sempet aika mamshitet taküm arishi atemstü ta parnoki meteta lir. Anungji, tanü putu nungbo government-i lanurtem asoshi inyaksüsbaji government mapa agütsüsbaba masü saka lanurtemi pei jangraba aser metetba mapatem tenzüka inyaksü asoshi sen apudak lenmang lapoktsütsü tim. Aji oda, kodang lanurtemi bank tapu balala nungi sendem tajemba nung sen apua mapa tenzüktetdir, idangjiang Nagaland rongsenketsüng nung renloker asütsü. Tang amai asen lima nung kibong shia government ita sen agi mesüba ajangabo asen lima rongsenren nung merenloktetsü. Asenoka asen lima nungi asenoki yanglutetba oset aser chiyongsü karbosa tangar dang yoktetsüsa inyaktetsüla. Item mapatem tenzüksü atema lanurtem sen apudak akatsüsbaji kanga rongdak nungdak kümogo. Iba timtem aser nungdakji meteta, tang state government-i Nagaland nung Securitisation and Reconstruction of Financial Assets and Enforcement of Security Interest (SARFAESI) Act, 2002 Nagaland nunga amshitetsüsa tatar senden nung telemtetba agitsü tebilemba lir. Atangji, iba ozüng ajanga bank nungi sen apur maotetra, asenok senmelen (mortgage) yutsüba ali kimong aser kiojen bank-i agiadoktsü aser tangar dang ayoktsü. Ibaji tim dang lir, kechiyong nisung shingaia angati asenok nem asen mapa inyaksü asoshi sen magütsütsü, anungji tapudak danga ngura, apur jungjunga inyaksü aser sentsüa mapang shitak nung aotsü bilema sena aputsüla aser mapaa inyaksüla. Nagaland nung lanurtem mapa tenzüka meinyaktetba timtemji sentsü maotetba timtem masü saka sen apudak makaba timtem lir, kechiyong Municipal alidak dak alaka alikimong akartem asüyonga pei alikimongji senmelen (mortgage) bank nung yutsür sen maputetter. Atangji, asenok aikati bank nungi apuba senji sentsü amai mebilemer, anungji angati anguba sen amato bilema endoker aser sentsü maotet timtem ajurur. Aji oda, Naga nungertemi tsübuba kaji, asenoki senmelen yutsüba alikimong aser alumang ajakji sentsü maotet ser Naga nunger masüba bendanger keti ora Naga nungertemji Naga lima nung ali makar kümadoktsü. Iba shisaboluji tim dang lir, anungji iba amaji mataloktsü atema state government-i India temzüng arla 371 A nung, Naga nunger li madakji Naga nungertem dang kibur asütsü ta lateta aliba ozüngji meraksai shitak amshitetsüsa inyaksü imlar. Bank nungi sen apuba ya sensakba agi apur masü saka takari takar kümnüba agi apur. Aji oda, kodang asen ali kimong bank nung yutsür, sen apuli aser mapang shitak nung aoli, ano apuli aser auli ta südir, oda odabo bank nung akaba sen ajakji asen sen amai kümadoktsü.

OLEMSABANG

ABAM inyakyim nung nübur taginüba indang-indanga shitettsüsa tesoitba kechameli-i lenmang sadem-sadema lapoka toktsütsüla

~ L. Kika Pongener.

Ao Baptist Arogo Mungdang (ABAM) ya Ao arogotem ajunga longjemdak sabang ka lir. Ao arogotem ajunga kati ka den sentaktepa, kati ka den longjema, arok külemi kenbang-opang ka nung, inyakyim ajak nung liromedema aotsüba nükjidong nung tentetba sabang ka asütsü. Aji oda, küm shia küm tatem nung ABAM küpok Ao arogotem ajunga nungi teshimtet nübu (delegates) jaoker, indi mungdang (Central Council) lia, taruba küm tepiyong mungdang terenlok aser mapatong balala teinyaktsü sentongtem ajunga bangzünga telemtetba agir. ABAM arakzua taküm alitsü asoshi küm shia lim arogotem ajungai pei pei ataba budget agutsür. Lim arogotem nung tzusenba züngsem ajungai züngsem saru agutsür. Anungji itum inyakyim ajunga jagi, ABAM nungji lim arogotem rongnung tuluba/tilaba, mesüra züngsem teimba/tajemba ta kecha tebandang mali arogo ajunga kasasa temeden lir ta tejangja küli sayur. Ano iba denji külemi, ABAM nungji lim arogotem nung aliba tzusenba züngsem ajunga kasasa temeden lir ta tejangja küli angur. Anungji mungdang ya kodaser tajungba nung anitsü, arogotem ajunga liromedema aotsüsa telemtetba shitak agitettsü, lim arogotem nung aliba amangbapurtem/tzusenba züngsem ajungai liromedema inyakyim ajak nung temulung sua anitaktetsüsa, mapatong/sentong ajak shitak ketdang sua inyaksüba nungji arogopur züngsem ajunga shilem lir.

Aji oda, ABAM küpok lim arogotem ajunga liromedema anitsü asoshi tensa den apet 'Temzüng' yanglua akatsü sudi, aser iba nungji ajemdaker mungdangji anir asütsü, saka ano alima melenshia aodang inyakyim kar nung temetongshitsü kar ajitetra, mesüra o-ralok kar inoksemtüsü ajitetra, mesüra ano alima tensa mepong den apet jungdak teinyaktsü maparen kar adokra/denjira, aser iba atemaji kija/lokta kari tebilemba (agenda) kar bennura, lim arogo ka ajangasa masüyongjia indang-indanga ABAM Executive Committee/Church Advisory Board ajanga agutsütetsüsa lenmang sadem-sadema lapoka ayunungbo kanga ajungtsü ta bilemer. Angazükba agi, ABAM temzüng nung, kija aser lokta kari ABAM dangi mungdang/arogo ajungtsü asoshi tebilemba (agenda) kar bennura, lim arogo ka ajanga dang abentsü akok, mesüra lim arogo kati 'Recommend' asünung dang agizüksü ta angazük. Aji oda, yamaji ka lira, tensa den apet yanglur asünung, tang tashi anir aruba nung aji tapet sur kecha tetsükdaktsü meli-i anir arudagi sudi. Ajisüaka, alima ainba den külemi tapensaba/tajungba nung ABAM küpok lim arogotem nung aliba arogopur züngsem ajungai temulung sua anidaktsüsa, tang tamshitak 'Temzüng'-jia tensa den apet tajungba/tapensaba melenshia yanglushitsüji kanga tongtipanga ta bilemer. Anungji kokrabangla, kija/lokta shirnoki mungdang/arogo ajungtsü asoshi tebilemba tajung (agenda/suggestion) kar bennur/agutsünur, parnok jagi indang-indanga ABAM Executive Committee/Church Advisory Board dangi abentsü, ajiser ABAM Executive Committee/Church Advisory Board jagi mapang agia tatsü-talang ajak asadanga kanga junga shisadanger, mungdang/arogo asoshi tajangzük asütsüsa tajung/takitsü kar danga lira, ABAM Executive Committee/Church Advisory Board-i telemtetba agutsütsü, aser ano nungdakra ken o karbo indi mongdang dangi approval atema abentsü akok, saka mungdang/arogo asoshi tajangzük kangarabo makaba 'agenda' dang sura tabener nem meyipa agutsütsü ta inyakyimji melenshitetra, ibajagi arogopur ajungai temulung sua anitaksüsa telemtetba tajung agitettsü ta bilemer. Ajisüaka, kodang lim arogo ka ajanga dang abentsüla, mesüra lim arogo kati recommend asünungdang agizüksü ta tesoitba/talenba ka yudir, ashiko, lim arogo nung aliba züngsemtem rongnungji, kechi nükjidong nung iba 'agenda'-ji abener, iba indangji kanga junga mangateterem züngsem teimba sura, mesüra ibala indangji practical nung ajangshia malir züngsem teimba sura, kanga tesasatsü-ka mungdang/arogo asoshi tebilemba tajung asüyongjia idakji remsepa ayutsü. Atangji, mungdang inyakyim nung ibala ama tesoitba/talenba kar lira, mungdang/arogo asoshi 'agenda/suggestion' tajunga aika melemsatepteti rema/nembanga ayutsü. Tanü ama alima kara-a tejakleni aoba putu tensa ka nung, alima nung linuk teimba ka nung sorkar ketdangsuba inyakyim nunga dena, nübur tulu-tila ajungai pei tebilemba sadem-sadema shitettsüsa (Freedom of speech & Freedom of expression) temzüng-ozüng talenba kecha meyui sadem-sadema temeden agutsür. Aji oda, ABAM ama mungdang ka yabo alima yimten bangdak ama masü, iba yabo tamang yimsu dak sentakba (purely religion) mungdang ka dang asünungji, tzusenba züngsem kija/lokta ajungai kecha tesoitba/talenba mekai, indang-indanga pei tebilemba shitettsüsa lenmang sadem-sadema lapoka yutsünungang kanga tajungba asütsü. Aji oda, lim arogo ka ajanga dang abentsüla, mesüra lim arogo kati recommend asünungdang agizüksü ta tesoitba ka 'condition' ayuba nungji, arogopur dang odi-odia meshitetba langka temeimpangba (Secrecy) kar ali asü (?)...ta ni ama mashi-malu/mangateter karibo shisadanger.

Ano kanga tongtipang amai bilemba ka, mapang kar nung, lim arogo kar nung, arogopurtemi mulung masütsüsa telemtetba kar agira, mesüra laishiba tesayuba amai mesui, mesüra ABAM inyakyim ama masü, arogopurtem mettsüdaktsüsa/ashishitsüsa telemtetba kar agira, mesüra maparen kar inyakshia atara, aser ibajagi arogo telung nungji mepetmesu adoker, iba ken o-ji angadangtsü asoshi ABAM Executive Committee/Church Advisory dangi kija/lokta kari zülura/benra, lim arogo ka ajangasa mabenyongjia, mesüra recommend masüyongjia agizüker, kanga junga angadanga shisadanger, telemtetba tajung ka agutsünungbo ajungtsü ta bilemer. Aji oda, mungdang temzüng agi memelarji ta sur magizüki züba-züba toktsür tia mekai-ka, ibajagi lim arogo nungji telemsa adokra, idangjibo mungdang-jia dena tokolak menutsüsa akümstü, kechiyong lim arogo nung tenzükertem jagi pei tashimait metongshidaktsütsü atema züluba/abenba 'Petition'-jibo ashiko, arogo jagi mabentsü, mesüra recommend masü ta bilemer. Anungji ABAM 'Temzüng' nung, inyakyim karbo khen meyipa repringshitsüla, aser ano karbo enoksemtüsüla lir amai bilemba agi, kü tangatetba tila agi tazüngertem den arok külemi shisadangtsü asoshi iba ocet ajanga lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Frontline Ministry ajanga Tuensang Town Baptist Lashong nung Mother Heart Skool November 11 nungi November 14 tashi agia liasü. Iba sentong nung shisalen sayurji Rev.Dr.Toshi Langu, Dr.Bendangyapangla Changkiri, Mrs. Limala Sunep aser Mr. Sashi Technical Asst. nunger liasü. Parnok ajak agi tetsü 30 Mother Heart Skool nung graduate süogo.

Khristanreshikangshirtamajungtibaji Taliban aser Nigeria lir: ICC

Washington, Yimpoksüi/ November 17 (Agencies): Tang mezüing International Christian Concern (ICC)-i Persecutor of the Year Awards report nung alima nung Khristantem tamajungtiba reshikangshiba telok/nija/linükji Taliban telok, North Korea lenir Kim Jong aser Nigeria linük lir, ta sangdongogo.

Mongolbarnü osangbenertem senden ka nung ICC-i 'Persecutor of the Year' award sangdonga kakat tapak 150 nung alima nung Khristantem tamajungtiba reshikangshiba telok 24 sangdong.

ICC-i ashiba agi, ICC putiotsü nung research project tulutibaji ibai lir.

Tang mezüing Persecutor of the Year Awards sentong ayonga agidang Persecutor of the Year Awards report agütsü. Tesüiba mapang nunga ICC-i alima nung religious freedom anema inyakba 'Hall of Shame' sangdonga liasü.

Osangbener den jembidang ICC Tir, Jeff King-i, sorkartem nem iba tebilemsü onük junga angatetdaksütsü nükjidong nung Persecutor of the Year Awards ya tenzük, ta metetdaksü. Persecutors of the Year list nung 2021 küm alima nung religious freedom anema inyakba linük tamajungtibaji Nigeria lir.

Jeff King ya 2003 küm nungi tang tashi ICC Tir inyaker, aser pai ashiba agi, Africa nung aliba linük (Nigeria) yagi tesüiba küm 20 tashi Khristantem anema inyaker aser aika tepseter.

Paisa, "Külen Khristantem anema inyaker, ano külen telok anati (Boko Haram aser Fulani) Khristantem anema inyaker," ta metetdaksü.

"Alima nung Khristantem

alitsü tamajungtiba tesemtem rongnung Nigeria densema lir, kechiyong 2000 küm nungi tenzüka tang tashi nung iba linük nung nisung 50,000-70,000 shi tepsetogo. Nigeria nung Islamic kiralongrar telok Boko Haram lir aser parnoki nisung meyrjang aika tepsetba ajanga nisung million aika jenshiogo," ta paisa metetdaksü.

"Tesüiba küm aika tsüingda Boko Haram telok dang nungibo Fulani teloki Khristantem timba tepsetogo aser ibaji ajanga aluyimer Khristan aika jenshiogo. Iba dakji alia Islamic telok balalai Khristan tsürtem kangshia Islam yimsü dangi meypdaksüba aser parnok den kibong kümdaksüba melar," ta pai metetdaksü.

Jeff King-i, "Khristan million 3 shi jenshiogo aser parnoki Khristantem meyong ki, ali aser alu rakzüka agir," ta metetdaksü.

Ajisüaka Nigeria sorkari itemji nokdangtsü atema kecha meinyaker aser Khristantem anema inyaker nem temerenshi magütsür; iba dak alia sepaitemia kecha meinyaker, ta pai ashi.

Nigeria kübok Kaduna State kija nunga 2000 nungi tenzüka 2021 küm tashi nung nisung 35,000 dak tema tepsetogo.

Ano külen ICC indang Persecutor of the Year nung Khristantem tamajungtiba reshikangshiba telokji Taliban lir. Taliban-i ki shia mita oa shirnoki mosque-i oa külemer aser shirnoki maoer iba osangji bendener. Khristantem ki mita aoe aser phone ajanga Khristantem amokmerener.

Jeff King-i, US sepaitemi Afghanistan toktsür aoba ajanga Taliban teloki iba linük agia yimsüsüba sülen

Khristantem kanga timtemer, ta metetdaksü.

"Tang Afghanistan nung Khristan 10,000 shi lir aser parnok ajakji Islam yimsü toktsür Khristan yimsü agizükertem lir. Taliban teloki Khristantem bushir. Tesüiba hopba ana tejaklen Khristan ka ket nung Laishiba aliba atema tepset. Parnoki ano Khristan aika tepsettsü aser Islam yimsü dangi meyipang ta tuyutsü. Islam yimsü dangi memeyipra reshikangshitsü aser parnoki meteta aliba Khristantem tenüing asüingdangba sülen tepsettsü," ta King-i metetdaksü.

ICC-isa Persecutor of the Year award kübok alima nung Khristantem tamajungtiba reshikangshiba lenirji North Korea lenir, Kim Jong un lir, ta metetdaksü.

ICC report nung shia aliba agi, "Kim kibongi (Tsüingrem/ Tebu/Techir) tamang nung ajemdaker yimsü dak sendakba inyakyim ka tentetogo aser iba nungji Jabasoji Kim Jong un lir, anungji nüburtemi pa külemtsüla."

North Korea nung Khristantem tamajungtiba reshikangshibaji Kim Jong un lir. Tamalen North Korea nung lenirtem- Kim Jong-II aser Kim II-Sung nungeria Khristantem reshikangshia liasü.

"Tesüiba küm aika tsüingda Kim tamarener kibongi Khristan million aika reshikangshia tepsetogo. North Korea nung kibong ka Khristan ta jangjara parnok den songsem-tangsem ajak tepseter," ta report nung shia lir.

King-i ashiba agi, North Korea nung Khristan 30,000 shi tepuokdak lir aser Khristan million 1 dak tema tepsetogo.

ANO GO ABEN TSÜNGREM DEN

Khrista ne dak alibaji nütsüingsüba

Aji temeshi pur nem metetdaksütsü Tsüingrem temulung chia liasü: iba miim oji nenok dak aliba, paji sentsüwangshi teimla. Kolosi 1:27

Tetenzük nungi kotaker Tebu sentongji Pa chir tamangertem dak lidaksütsüba liasü. Na Khristan ka süra Tsüingrem tabensaba ajak ne dak lir. Khrista takümüji ne taküm akümer. Kodang Khrista ne dak lidir, Pai kotaker temoatsü ajak ne dangi bener arur. Ne nüngdak ajak nai kangki nung asüba aser shia aruba aser alima madak Kibuba dak nai angur. Kodang Tsüingremi na Pa mapa nung atentsü ajar, ne taküm ajanga Pai nüngloktsüba mapa inyaksü asoshi par chir ne dak lidaksür.

Nü Khristan taküm asoshi ibai tongtipang lir. Nütsüingsüba tekolok temetetba aser Laishiba tekongtem temulung nung ayuba dang nungi tongtipangba lir. Ibai Yisu Khrista ne taküm nung sadoksadoka litettsüsa ne taküm Pa nem bendanga agütsüba lir.

Na ajanga mapa tulu inyaka na meketa aliba purtem dangi Tsüingremi jungkai adoka sayudaksüner. Pai ne dak anogo shia ner kibongi Khrista ngua lidaksüner. Tsüingremi ne taküm ajanga Pa temeim sayudaksüner. Khristan taküm ka aliba aser ne taküm nung Khrista taküm alitsü melaba nung tepila tulu lir.

Tang mezüing 'Video Bible' app adoktsü atema maparen tenzükogo

November 17, 2021: Khristan indang Laishiba App ka- The Video Bible yangludat; Laishiba jungjunga angatetdaksütsü nükjidong nung iba maparen ya tenzük.

Video Bible App ajanga Laishiba tetenzük nungi tatembang tashi nung shia alibatem indang sayatsü aser ibaji tetenzük nungi tatembang tashi repringmatsü atema küm 3 dak tali agitsü, ta iba app tenzüksang, Dave Pillow-i metetdaksü.

Iba app ya Laishiba mezüingteter tanur-tain ajak dang osangtajung prokshitsü atema lir. Audio aser video nung rangloker yangluba app ajanga nisungtemi lenmang tasen ka ajanga Laishiba nung shia alibatem metettsü, ta Pillow-i metetdaksü.

Interview ka nung jembidang Pillow-i, "Onoki alima nung Arogotem atema bilemstür aser Kibuba atema inyaker, anungji iba tangatetba nungji ajemdaker iba maparen tenzüktsü atema onok jatet," ta metetdaksü.

"Onoki nisungtem nem Yisu taliba jangjadaksüner aser Tsüingremi parnok meimer ta angatetdaksüner. Iba ya nüngdak ta onoki angatet, anungji lenmang tasen ka ajanga Tsüingrem O metettsü atema onoki iba maparen tenzük," ta pai ashi.

Iba app ya kodang sayatsüar mejangja, ajisüaka The Video Bible app ya device platforms kar nung angutsü, ta Pillow-i metetdaksü.

Tang atemabo The Video Bible ya Youtube aser platform indang website nung dang angutsü. YouVersion app bo sabang kar nung sayaogo.

Pillow-isa, nisung aikati iba

website amshi tenzükogo aser kasa platform nung YouTube versions repring tenzükogo, ta metetdaksü.

Pillow-i ashiba agi, alima nung nisung million 75 shii Laishiba mezüingteter aser nisung million 35 shi junga azüngtsü makoker. Ano teintet senso million 54.1-i junga mezüingteter aser US nütsüing shilem asemstü nungi shilem kati Laishiba junga mezüingteter, anungji kodang iba app sayadir iba app ajanga tamangertem tali renloktsü, kechiyong parnoki phone aser tanga 'device' ajanga Tsüingrem O metettsü.

Project tasenba maparen tenzükba atema Biblica, YouVersion aser The Gospel Coalition densema telok aikati pelaba lemsatepogo.

Biblica-i The Video Bible atema English, Spanish, Russian, Chinese, Arabic aser Portuguese densema oshi aika nung New International Version Laishiba agütsüogo.

Pillow-isa video bible app ya akoba tashi oshi aika nung agütsütsü atema tanga Khristan ministries den-a jembitsü, ta metetdaksü.

"Tsüingremi kü melungjang nung iba ya apitetdaksü aser kü tembar aikati ni yaridar. Iba ya atangji ataloktsü atema artists, Laishirtem aser pastor aikati yariteptsü. Iba ya longjemer inyakba mapa ka asütsü. Ni Yisu kanga meimer aser Pa den tesendaktep ayubaji kecha den-a medemdangtsü makok," ta Pillow-isa metetdaksü.

Taoba mapang Pillow tekolok nung timtem adoka hospital nung amongba mapang nung pai Khrista agizüka liasü, aser iba mapang nungji The Video Bible platform adoktsü atema Tsüingremi pa den jembia liasü.

Democratic linük ka nung state tem shilemji tongtibang: PM Modi



November 17, 2021 nü New Delhi nung Ato kilonser, Narendra Modi-i video conferencing ajanga 82buba All India Presiding Officers' Conference tenzüksüba noksa nung angur.

Shimla, November 17 (Agencies): Bodhbarnü Ato kilonser, Narendra Modi-i, India ama democratic linük ka nung state tem teinyaktsü shilemji kanga tongtibang, ta ashi.

82buba All India Presiding Officers senden nung video conferencing ajanga Delhi nungi jembidang Modi-i, taruba küm 25 nung linük atema pei shilem inyaktüsü, kechiyong iba mapang tashi nungji India nung nuchiso anguba sülen küm 100 ajungtsü, aser iba osang ya Parliament aser state legislatures nungi sangdongtsüla, ta metetdaksü.

Anogo ananü Presiding Officers senden ya Shimla nung ayongzüka agidar.

Ato kilonserisa, linük telongjem atema melung masüba olatem mita alitsüji legislatures teinyaktsü mapa lir, ta metetdaksü.

Parliament nung aiben onük balala nung ajemdaker senden junga magitetba dak sendakba nung Modi-i, MP temi India nung inyakim tajung nung ajemdaker bentshitsu, ta ashi.

"India atema democracy ya inyakim ka dang masü. Democracy ya India nunger dak keta aliba yimya ka lir," ta pai ashi.

All India Presiding Officers' Conference (AIPOC) senden nung AIPOC-i linük nüchiso ngur küm 100 ajungtsü lenmang nung jajaba, linük temzung dak sendakba nung presiding officers teinyaktsü shilem, House aser nüburtem densema onük aika jembitsu.

India-i coronavirus wara anema longjemer raraba dak sendakba nung Modi-i, "Linüki longjemer iba tongbang tulu anema rara aser state tem longjemer rara. Iba ya putiotsü ka lir. Tanübo India nung

vaccine dose crore 110 dak tema agütsüogo. Mapang ka nungbo tamakoktsü, ta bilema aliba tangbo kokogo," ta metetdaksü.

"Asenoki iba linük ya temaba jenjang kati anitsüla. Asenoki alizüung tulu koktettsüla, aser ibaji ajaki inyakba ajanga dang akoktsü. Democracy nung ajak adentsüla aser India nung federal sorkar inyakim nung tamendakdakji state tem shilem lir," ta paisa shisem.

Kasa senden nung Lok Sabha Speaker, Om Birla-ia jembia liasü.

AIPOC senden ya November 17 nü tenzük aser November 18 nü tembangtsü. AIPOC senden ya Shimla nung tang agi tenetbenbuba ayongzüka agir. Tamalen 1921, 1926, 1933, 1939, 1976 aser 1997 kümtem nunga iba senden ya Shimla nung ayongzüka liasü.

Delhi nung school tem shibanger aser Industrial mapa nokdang

New Delhi, November 17 (Agencies): Diwali benjung mapang nungi tenzük Delhi nung mopung kanga menenba aser alu nung monü rongdokba ajanga mopung kanga menenba sülen yimti nung mopung menenba nokdangtsü atema sorkar aser Supreme Court-i tesüiba anogo aika jembia aruba sülen Delhi nung school tem shibangogo, industry mapa ajak nokdang aser mapa inyakertem shilem 50 dang mapai aotsü lemtetogo.

Environmental activist, Aditya Dubey aser Law student Aman Banka nati Supreme Court nem temepishiba ken o ka agüja alu nung monü rongdokba anentsü atema aluyimertem nem 'stubble-removing machines' angati agüjang, ta mepishia liasü.

Delhi nung Arvind Kejriwal-i aniba AAP sorkari Delhi nung mopung menenba nokdangtsü atema mera aika agia inyakdar.

Sorkari nija bus 1,000 shi hire süa nüburtem dang public transport nung dang senzütsü

mepishiogo. Iba dak alia yimti nung odd-even scheme tenzük gari number odd/even lemsar anogo balala nung senzütsü atema telemtetba agitsü.

Commission for Air Quality Management (CAQM)-i Bodhbar nungi National Capital Region nung school, college aser shisaliok reju ajak shibangtsü tuyuogo aser NCR nung taruba Amongnü tashi office tem nung staff tesadang (shilem 50) dang mapa inyaktsü tuyuogo.



November 17, 2021 nü Lucknow nung Samajwadi Party nungi MLC pezü BJP nung adenba sentong nung tangokba noksa nung angur. Noksa nung BJP Tir, Swatantra Dev Singh aser Uttar Pradesh Deputy Chief Ministers- KP Mauriya aser Dinesh Sharma nata angur.

Pakistan-i tim masüba nung UN indang sabang amshir: India

New York/New Delhi, November 17 (Agencies): Pakistan-i UN-i agütsüba sabang amshia New Delhi anema tiyazü osang proker, ta shia Pakistan-i Kashmir ken o kakteta jembiba atema India-i Pakistan linük aitsüogo.

United Nations Security Council (UNSC) nung India-i Pakistan dang Jammu & Kashmir nung nenoki ozüing alema atsüing aliba area ajak tangsa azüingtetjang, ta metetdaksü.

India's Permanent Mission to the UN Counsellor, Dr Kajal Bhat-i, "Union Territory of Jammu & Kashmir aser Ladakh ya India shilem liasü, tanga India shilem aser tarutsü nunga India shilemsa asütsü. Iba nungji Pakistan-i ozüing alema agiba tesemtem densema lir. Onoki Pakistan dang tangsa item tesem ajakji azüingtetjang ta akhanger," ta metetdaksü.

UNSC nung onük jembia tenzük Bhat-i, "Tanep Pakistan ketdangsertemi jembiba otem nung ni telangzüba agütsütsüsa akümer," ta metetdaksü.

Pakistan linüki UN sabang

tim mesüi amshia India anema yazü osang agütsüba ya tang mezüing masü, ta shia Bhat-i, Pakistan ketdangseri amajok nung par linük nung tatalokbatem mimbangtsü merangogo; par linük nung kiralongrartem sadem-sadema alir, aser ibaji ajanga nüburtem, talisa minorities timtemer, ta metetdaksü.

Laisa, akhidang nungi Pakistan-i kiralongrartem jenokdaksüba, senotsü agi yariba aser hadir agütsübaji par linük inyakim ka lir, ta züingsem linüktemi meteta dang lir, ta ashi.

India-i Pakistan densema kidanger linük ajak den tesendaktep tajung yuner, aser mangatetep ken o ajak bentetner; Shimla Agreement aser Lahore Declaration nung ajemdaker yimjung ajanga ken o ajak bentenner, ta laisa metetdaksü.

"Ajsüuaka rara maliba ajanga dang yimjung ken o jembitettsü, saka Pakistan-i tensa raksatsür, anungji arrtsü adena kiralongraba anema India-i telemtetba agia inyaktsü," ta laisa shisem.

Kiralongrar tenüing amer nübur tepseter: Mehbooba Mufti



New Delhi, November 17 (Agencies): Hyderpora nung tatalokba ajanga tejashi nung Bodhbarnü Peoples Democratic Party (PDP) Tir aser taoba mapang Jammu & Kashmir Chief Minister, Mehbooba Mufti leniba nung party lenirtemi Kashmir nung civilian aika tepsetba anema longkak ait aser Hyderpora nung tatalokba bushisüngdangtsüla, ta takhangba agütsü.

PDP office kima longkak aitba mapang osangbener den jembidang Mufti-i, "Ni longkak aiter, kechiyong iba sorkari kiralongra tenüing amer civilians tepseter. Kiralongrar tepseter asü masüar shingaia memetet. Tawa civilian asem tepsetogo. Sorkari parnok tasü mangji parnok kibongtem nem agütsütsü memelunger," ta metetdaksü.

Laisa, asür kinüingertemi Srinagar nung longkak aiter aser tasü mang agüjang ta akhanger, ta metetdaksü. PDP lenirisa, Armed Forces

Special Powers Act (AFSPA) benokba mapang nungi tenzük tai maketerem tepsetba anema kecha meinyakteter.

Hombar nikingdang Hyderpora nung kiralongrartem mita aoba mapang sepaitemi civilian ana densema nisung pezü khaseta liasü.

Mehbooba Mufti-isa, "Hyderpora nung tatalokba ya judicial ajanga bushisüngdangtsüla. Civilian asem khasetba ya kanga tia maka. Civilian temji Over Ground Workers (OGWs) ta tai tonglokja tepseter. Parnok OGWs liasü ta kuli magütsüteter. Item ama tatalokba ajanga onok kanga jashidaksür. Iba tatalokba ya judicial ajanga bushisüngdangtsüla, aser aibelenertem nem temerenshi tulu agütsütsüla," ta takhangba agütsü.

J&K police-i ashiba agi, Hyderpora nung sepaitemi Pakistan nung kiralongrar, Haider aser Mohammad Amir na den civilian ana- Altaf Bhat aser Mudassir Gul na khaset.

Philippines election nung Marcos Jr shilem magidaktsütsü bushir



Manila, Yimpoksüi/Nov. 17 (Agencies): Taoba mapang Philippines nung tashi tait lenir, asür Ferdinand Marcos'er jabaso taruba küm tir election nung shilem magidaktsütsü asoshi telok kati election commission dang asüngdang, kechiaser pa ya saru magütsüba nung aija lir, ta ashir.

Campaign Against the Return of the Marcoses and Martial Law nungia agüja aliba telok yagi Ferdinand Marcos Jr disqualification atema petition ka Bodhbarnü agüja liasü.

Iba telok indang convenor tem rongnung ka aser taoba mapang congress züngsem alisang Satur Ocampo-i ashiba agi, danga telok kati agüja aliba petition ama iba petition ajanga Marcos-i küm 20 dak tema saru memonoki aruba indang ken o tutetja lir.

"Nübur lenir shirnoki internal revenue code nung aibelena ali, parnok ya nübur len anitsü

metemsü kumdaktsür aser election nung shilem magidaktsür," ta Marcos dictatorship anema rarasang Ocampo-i ashir.

Marcos Jr dang ya Bongbong ta ajar aser taruba küm May ita agitsü aliba election nung pa yakbang lir.

Ferdinand Marcos ya bendang lima nung jenoka alidang 1989 küm asü aser pai Philippines nung küm 20 jungnüa yimsü süa aruba mapang 1986 küm "people power" revolution nung atsüngdoka liasü.

Marcos yimsüsüba mapang sorkar meyong sen dollar billion aika tashiyim agi auya ta aitsüba ya tai lir ta pa kinungtsü aser tanurtemi shijen ashir. Pai sorkar sen auyaba ya billion \$10 shi alitsü ta 1987 küm asadangteta liasü.

Marcos Jr yagi 1982 nungi 1985 tsüngta pa indang income tax returns magütsü, ta court kati 1995 küm aija liasü. Iba taitsüba

ya court kati 1997 küm soita liasü.

Iba taitsüba laka Marcos Jr ya governor, congressman aser 2010 küm senator ka ama shimteta liasü.

Pa taoba mapang menden balala nung shimokba mechi iba ken o tanaben mebenoktsü ta shia mali, ta Ocampo-i ashir.

Marcos anema yimten yimsüsür pua alirtem tenüng nung tentetba telok ka, human rights aser medical organisation temi benoka aliba disqualification ken o ya November 26 nü election commission ajanga jembitsü renema lir.

Arishi küm 64 tain Marcos-i iba petition ya temzüng-ozüng tsütsü tamendak dak mali, ta ashir.

Tir Rodrigo Duterte'er jala ya pa indang tatong tir ka ama inyaktü atema tokteptsü, ta Marcos-i Mongulbarnü sangdonga liasü.

Azerbaijan-Armenia arütsü nung rongrong adoka sepai ti asü

Baku, Yimpoksüi/Nov. 17 (Agencies): Arütsülen Armenia sepaitem den raraba mapang sepai züngsem tenet asü aser 10 dak tema yiru, ta Azerbaijan indang defence ministry ajanga ashir.

Armenia ketdangsüria Mongulbarnü rongrong nungya nisung ka asüba osang sangdong aser sepai 13 apu aser 24 samar lir, ta ashir. Iba mepetmesü atema linük kati ka aitsür.

Azerbaijan mitkartemi Armenia mitkar dak injang khaloktsü, ta Armenia defence ministry ajanga ashir.

Külen Azerbaijan sorkari Armenia-i rara mesür, ta ashir.

Nagorno-Karabakh regiom mechi taoba küm hopta trok raraba sülen taoba mapang Soviet kübok aliba linük ana tsüngta tan ya tesashitiba raraba alitsü. Taoba küm iba rara nungya nisung 6,500 dak tema tekum sama.

Mongulbarnü asü-amaba ajanga parnok ali raktepba nung mapetmesü tali adoktsü tsübur.

Russian Defence Minister Sergei Shoigu-i Armenia aser Azerbaijan defence minister den phone ajanga jembia rara anentsü ajungshiba sülen rara ya Mongulbar nikongdang nungi anena liasü.

Armenia Ato Kilonser Nikol Pashinyan-i Russia Tir Vladimir Putin den arütsü tensa indang jembia liasü.

Armenia aser Azerbaijan ya

küm aika Nagorno-Karabakh mechi mangatetep nung arur, koba Azerbaijan telungzüik nung lir saka 1994 küm yangji rara ka tembangba sülen Armenia-i yariba ethnic Armenian forces ka kübok liasü.

Taoba küm iba litsü asoshi raraba ya Russia-i tetsüngtai ia November ita tembangba liasü aser iba region nung peacekeeper 2,000 jungnüa yoka liasü.

Turkey ya Azerbaijan den adener, shirnoki taoba rara nung samar aliba alinük tuluka tanaben ngutetogo.

Russia tetsüngtai ia rara anentsü renemba ajanga Azerbaijan-i Nagorno-Karabakh aser temeket tesemtem tuluka tanaben agitet, koba Armenia-i nungitba nüburtem kübok liasü.

Ajisüaka Azerbaijan sepaitemi litsü agia aruba atema Armenia-i longkak aitba sülen May ita nungi Armenia-Azerbaijan arütsü nung tensa tamajungba kuma arua liasü.

Azerbaijan-i arütsü ano masazüki alidak par litsü nung sepaitem yok, ta ashir. Iba sülen arütsü nung rara adoka aru.

Azerbaijan sepaitemi arütsü alema aru, ta Pashinyan-i Hombarnü aitsü aser iba mechi pa indang defence minister mapa nungi anenja liasü.

Armenia indang Security Council ajanga Russia dang par litsü temeden wazüka ayuba nung yaritsü ajungshir.

Longkak aittsü lia Sudan ketdangsüri lenmang shibang

Khartoum, Yimpoksüi/Nov. 17 (Agencies): Mitkartemi tashiyim amshia sorkar atsüngdokba anema Sudan yimtiba, Khartoum nung nüburtemi longkak aittsü ghonda ishika lia ketdangsürtemi Bahri aser Omdurman den sendaktepba apu 10 aliba nungi pezü shibangogo, ta Sudanese television ajanga ashir.

Civilian sorkar meyipa agütsütsü asoshi takhangba agüja Resistance committee ajanag linük tesem ajungalen nungi Bodhbarnü Khartoum nung nisung million ka adenshia longkak aittsü ayongzüka liasü.

Sudan mitkar tekolakba Abdel Fattah al-Burhan-i October 25 nü state of emergency sangdong, sorkar anentsü aser civilian lenirtem pua liasü. Taoba hopta Sudan mitkar lenirtemi Sovereign Council tasen shima 2019 küm Tir Omar al-Bashir atsüngdokba sülen civilian aser mitkar lenirtemi tentetba transitional sorkar melen.

Sudan nung mitkari tashiyim amshia sorkar atsüngdokba atema hopta tatemlen longkak aitba nung

asür nisung ti jungogo, ta doctor temi ashir, anungji taoba ita mitkari sorkar atsüngdokba sülen nisung tepseter 23 jungogo.

Honibarnü longkak aitba mapang takum samartem rongnung lanur asem dena lir, koba October 25 nü mitkakri sorkar atsüngdokba sülen tashiyim amshiba tesashitiba alitsü.

Longkak aiter nisung ti tepsetba tenüng ajunga Central Committee of Sudanese Doctors temi jangjaogo aser yangji arishi küm 13 tain Remaaz Hatim al-Atta, shiba dak Khartoum nung lar ki jakdang tekolak nung injang agi akha aser Omar Adam, shiba dak yimti nung longkak aitba mapang tekong nung akha, tenaprong densema lir.

Mitkartemi sorkar atsüngdokba ajanga linük balalai aitsüba ola adok, teyari aika agientsü aser tashi tulu aliba linüktemi civilian nem yimten tashi meyipa agütsütsü akhang.

Internet shibangja osangtsüsang agiba nung timtem ajuruaka longkak aitertem anogoshi tesem balala

nung adenshir, kong longkak aitertem graffiti aser SMS amshia ayongteper.

Taoba ita sorkar atsüngdokba sülen sorkar ketdangsür aser yimten yimsüsür 100 dak tema den longkak aiter aser activist aika puogo. Mitkartemi Ato Kilonser Abdalla Hamdok ya Khartoum nung par kidang pua yua lir.

Mapang talangka nungi yimsü süa arusang al-Bashir atsüngdokba sülen Sudan nung democracy dangi meyipba maparen achayangtsü atema mitkar aser civilian tsüngta tashi lemsateptsü tezüngzüktep agiba nung shilem ka ama tentetba aliba Sovereign Council meyipa magütsü tashi maneni longkak aittsü, ta democracy bukumertemi nangzüka lir.

Ita tetenzüklen osangbener den jembiba mapang, civilian sorkar nem tashi meyipa agütsütsü tangatetba nung inyaker, ta al-Burhan-i shia liasü aser transitional mapang sülen aruba sorkar inyakyim kecha nunga shilem magütsü nangzüik. Saka taoba hopta pai Sovereign Council tasen tentetba sangdong aser yangji pasasa pa tekolakba shima liasü.

Myanmar mitkari Suu Kyi anema ochi mashi ken o benok

Yangon, Yimpoksüi/November 17 (Agencies): Myanmar nung junta-i, sorkar menden nungi atsüngtoker aliba lenir Aung San Suu Kyi, 2020 election inyakyim nung ochi mashi ken o dak ajemdaker aitsüogo, ta state media sangdong ka ajanga Mongolbarnü metetdaktsü.

Suu Kyi ya election inyakyim nung ochi mashiba aser ozüng alema inyaksangshiba atema aitsüogo, ta state meyong osang kaket Global New Light of Myanmar-i metetdaktsü. Ajisüaka okadak ken o kodang angadangtsü iba indang osang tejangja magütsü.

Taoba tir Win Myint aser election commission mendenbuba densema ketdangsür 15 anema kasa taitsüba benokogo, ta sangdong ajangsa metetdaktsü.

February ita military-i sorkar atsüngtokba sülen Myanmar nung mepet mesü tulu adoka nüburtemi longkak ait tenzüik aser sepaitemi nüburtem tashiyim agi azüokba mapang

nisung aika tepsetogo.

Arishi küm 76 tain Suu Kyi ya bendanglen nungi walkie talkies bener aruba, ozüng anema inyaktü ajungmesoba aser tanga ochi mashi ken o aika nung aija lir aser okadak aitsüra küm aika tepuokdak ayutsü.

Election matong tsüngda nübuyimba mapang coronavirus dak sendakba nung tenokdangba agütsür aliba sülen manidakba atema la tang okadak obendangba mapang lir.

International observers temi ashiba agi, 2020 election ya ochi nung kecha tebandang makai agiogo.

Junta-i NLD loksatsütsü amokmerenogo aser taoba ita Suu Kyi nem teyari agütsür aser party nung tongtibang lenir Win Htein küm 20 atema tepuokdaka yokogo.

Myanmar nung sepaitemi sorkar atsüngtokba sülen tang tashi nung nisung 1,250 dak tema tepsetogo aser nisung 10,000 dak tema puogo, ta local monitoring group kati metetdaktsüogo.

Nagaland State Bharat Scouts & Guides pur Award Rally Camp tenzükogo



Dimapur, Yimpoksüi/ November 17, 2021 (TYO): Mongolbarnü, State Training Centre, Nerhema nung Nagaland State Bharat Scouts & Guides pur Annual Award Rally Camp tenzükogo, ta sangdong ajanga metetdaksü. Iba Award Rally Camp ya November 19, 2021 tashi agütsü. John Tochimong State Organising Commissioner (Scout) aser Vimezhonu State Organising Commissioner

(Guide) akhüm nung iba sentong tenzükaga liasü. Dimapur, Kiphire, Kohima aser Wokha District tem nungi Scouts 23, Guides 23 aser Rover Scouts 2 shi 'Scout aser Guide' atema State highest Award agizüksü temsüa lir. November 18, 2021 nü Durbar Hall, Raj Bhavan, Kohima nung Nagaland Angh ajanga item Scouts & Guides aser Rover Scouts nem Rajya Puraskar (Governor's Scout/Guide/Rover

Award) agütsütsü. Iba anogo (November 18) Nagaland Angh, Prof. Jagdish Mukhi ya Nagaland State Bharat Scouts & Guides indang 'Chief Patron' ama agizüksü/anioktsü. Scouts & Guides nem tematiba award (Rashtrapati Award) agütsütsü asoshi küm shia iba Award Rally sentong agir. National level nung Scout & Guide atema Rashtrapati Award ya tematiba asütsü, ta kasa sangdong nung shia lir.

DWSM senden Peren nung menogo



Dimapur, Yimpoksüi/ November 17 (TYO): Peren District Water and Sanitation Misson (DWSM) senden November 17 nü DC conference hall, Peren nung menogo. Iba senden ya Deputy Commissioner Peren, SentiwapangAier, NCS lenisüba nung agia liasü. Senden nung DC-i, DWSM ya Jal Jeevan Mission (JJM) nung shilem ka ama PHE Department kübok inyakyim ka lir ta ashi. JJM nükjidong indang jembiba mapang EE Peren (PHED), Bursenla Ao-i, yimdam yimsüngtem nung

kibong shia nem Functional Household Tap connection (FHTC) agütsütsü aser iba den Schools, Anganwadi centre tem, Community buildings aser Health center ajak nem tzi agütsütsü aser local temi senotsü, nübu aser osetsüt tenla agüja pei meyong ama angatetdaksütsü, tap connections inyakyim asadangsü, water source, water supply infrastructure amala water supply system talangka amshitsü atema teyari agütsütsü, O&M atema fund aser human resources terenlok aser empowerment atema iba sentong ya India Ato Kilonseri 2019 küm August ita 15 sangdonga liasü, ta metetdaksü. Laisa, JJM nükjidong ataloktsü atema tasa balala benoka inyaksü nungdakba aser DWSM shilem aser inyakyim indang aser Peren

District nung Jal Jeevan Mission kübok inyakyim balala indang metetdakja liasü. Senden nung züngsemtemi Peren District kübok RD Block tem nung JJM Model Village pezü amenoktsü agizü, kong Peren Block kübok New Peren Village, Jalukie Block kübok Punglwa Village, Ahthibung Block kübok Songlüh Village aser Tening Block kübok Tening Village densema lir. Maneni senden nung Water Resources Department ketdangsürtemi "Jal Shakti Campaign-Catch the Rain" programme dak sendakba nung presentation tatsüka agütsü. Deputy Commissioner-i, DWSM züngsemtem dang Peren District kübok RD Block tem nung tang shimba JJM model village tem külemi semdangsü aser Schools, Health aser Anganwadi Center tem nung awareness sentongtem achaayanga agütsü ayongzüka liasü. Paisa, tang shima aliba model village tem nung sentong balala takok ngua benokyonga aotsü atema tanga convergent department tem dang teka amteper inyaksü ayongzüka liasü.

Mon nung SNCU lapokogo

Mon, Yimpoksüi/November 17, 2021 (TYO): National Newborn Week (November 15 nunhiy November 21, 2021) agiba mapang, Mongolbarnü DH Mon - 1st floor New Building nung SNCU lapoka liasü, ta sangdong ajanga metetdaksü. Dr. Temjentsungla Addl. Director & SPO (RMNCAH+N)-i iba Plaque lapokja liasü aser DH Mon, Chaplain, Y.P David-i meshiteta sarasademtsü. Iba sülen, Conference Hall, 3rd floor nung sentong agi aser iba sentong nung Dr. C.L Peter, MO DH Mon menden liasü. Iba sentong agiba mapang "National Newborn Week" nung presentation agütsü. Sozükli alir tanurtem anepalutsü indang nung tekümdangtsü osang sangdongtsü nükjidong nung iba sentong agir.

NISUNG SAMAR BUSHIR



Mr Proodip Marak Bus driver Yaongyimsen yimdam nungi 14th Nov. aonung kidang nungi oa adokba meyipa marur, kari ngura iba no nung osang yoktsü mepishir.

Phone No.
7005071440 / 9362577342

ALI AYOKER

Tir Yim anasa Seithekima nung, Nonee Resort junction nungi kilometer tesadang ka shi pilar ali takong tayoktsü lir. Ali tasazük Pura 7 (seven) lepzüka ayoktsü akok. (Rate Negotiable).

Contact : 9366045902 / 8787566694

Mr Akumjung I Pongen nem tenüngsang agütsür Rhodes Scholar 2022



T. Meren Pongen aser Dr Elizabeth Walling na jabaso **Mr.Akumjung I Pongen**-i University of Oxford, England nung post-graduate degree agütsü atema 2022 asoshi Indian Rhodes Scholars ama nisung pongu shimba nung pa-a züngoksemteba atema Dibuia Planning and Development Board indang Dibuia Education Committee kanga pelar.

Rhodes Scholarship ya 1903 küm amenok aser iba ya alima nung international postgraduate scholarship programme tem rongnung tejentiba aser ajaki meraketa agizükba programme ka lir. Akumjung ya Nagaland nungi iba scholarship angur mezüngbuba lir. Yimer aser Naga nung atema kongnang tetushi tulu bener arutsüba atema onoki pa nem tenüngsang agütsür aser takok nguyonga aotsü imlaja atar. Na takokma nung maneni renloka aotsü imlaja atar.

Sd/-
(MSUMEREN)
Convenor

Sd/-
(BENDANGLILA)
Secretary



**CHANGTONGYA
SENSO TELONGJEM
KOHIMA**

HON JUBILEE

Benjongmung
2021

Omen : "MESENENBA MITSÄ"

Anogo :
19 November
2021

Mapang :
11 Ako

Tesentepdak :
Molu Ki
Merhülüetsa, Kohima

Tetushi Tejaoker :

Wb. Imnatiba
Hon'ble Advisor

Industries and Commerce, Labour and Employment,
Skill Development and Entrepreneurship
Nagaland : Kohima

SENTONG

Menden : **Ketdangpurtem**

- Jubilee nüngsang sarasademtsü** : Rev. A. Chuba Jamir
Pastor, KABA
- Tayongzüka O** : Wb. T. N. Jamir
IFS (Rtd.), Treasurer, CSTK
- Tepela O** : a. Kohima Aor Telongjem
b. Langpangkong Senso
Telongjem Kohima
c. Changtongya Village Council
d. Wb. S. P. FRANSIS,
Managing Director
Model Higher Secondary School
Kohima
- Nüngo kaket saya**
- Tetushi tejaoker nungi**
- Temeja Ken** : Changtongya Kaketshir
Telongjem Kohima
- Tongti O jembir** : Dr. Tainla Mar
- Jubilee Bangzüng** : Wb. T. Mar Longkümer
Executive Convenor, CSTK
- Melepzüng O** : Wb. I. Noksang
Convenor
Hon Jubilee Planning Committee
- Tatem Sarasadem** : Telok

* Kohima nung alir yimnasanger aser anükabang ajak iba sentong nung arua adentsü pelashishia jaoker.

* Iba sentong takok angutsü asoshi ajaki sarasadema atalidi.

Mens U25: Nagaland-i wicket 5 agi Manipur makok



Dimapur, Yimpoksüi/November 17 (TYO): Mens U25 State A One Day Trophy nung tanü Nagaland team wicket 5 agi Manipur-i makok. Iba asaya Nehru Stadium, Guwahati nung asayaa liasü.

Toss makokba sülen Nagaland team mezüing bat asütsü maongka agütsü aser parnokki over 47.2 nung asayar ajak out ser run 195 dang yanglutet.

Asaya nung Nagaland team

atema captain Akavi run 68 yanglu aser Hiketo (32 runs), Sanjay (25 runs) aser Tohuka (23 runs) nungeria pa nem teyari agüja liasü. Asaya tetenzüklen Nagaland team nungi top order batsmen temi kanga junga asaya saka asaya tatemlen junga masayateti parnokki asaya akoktsüsa run meyanglutet.

Manipur nunger bowler tem rongnungi Bikash Singh-i weicket 3 agi aser Bidash, Alfred Hmar aser Nitesh

nungeri wicket anana agia liasü. Asaya tanabuba shilem nung Manipur team-i over 42.2 nung asayar 5 out ser Nagaland team-i yanglua aliba run menep. Nagaland team atema Sunil-i wicket ana agi aser Mynul, Akavi aser Tohuka nungeri wicket kaka agia liasü.

Nagaland team taruba asaya Bresthibarnü Arunachal Pradesh den ACA Stadium, Barsapara, Guwahati nung anepdang 8:00 ako nungi tenzuka asayatsü.

1buba Ashes Test atema Usman Khawaja shimogo

Yimpoksüi/November 17, 2021 (Agencies): Ashes atema asayar 15 shimba nung Usman Khawaja züingoksemogo aser England den iba asayamung nung asayashitsü akok.

Arishi 34 tain asayar ya 2019 Ashes series nung mishimba sülen Australia tenüing nungi tang tashi nung khen danga asayaa mali, saka domestic cricket asaya nung pai Queensland nungi kanga junga asayadar aser middle order nung jenjang ka atema Travis Head den tokteptsü akok.

Ashes series ya December 8 nü Khawaja indang home ground Gabba nung asayaa tenzüktsü. Australia-isa, December 1 nungi 3 nü tashi nung Brisbane nung internal trial ya ayongzüka asayatsü aser iba ajanga Twenty20 World Cup squad anogo 14 quarantine asütsü mapang peria agütsütsü.

Australia selector George Bailey-i ashiba agi, Khawaja

shibai test asaya 44 nung century ti yanglua asaya shia avereg 41 lir pa Sheffield Shield nung ka junga asayago, ta ashi.

"Pa kanga dang tesüingjem aser consistent aser iba den batting lineup nung asayar tejen ka aliba tajangzük agütsür aser Test nung pai run yanglutetba kuli sayuogo.

"Pai position mashi ka nung bat süteter," ta Bailey-isa ashi.

Wicketkeeper Tim Paine-i aniba team nung ya David Warner aser Marcus Harris na opener aser Marnus Labuschagne aser Steve Smith na Nos. 3 aser 4 nung bat asütsü imlar.

Bowling nung Pat Cummins, Josh Hazlewood aser Mitchell Starc nunger nem Jhye Richardson aser Michael Neser nati teyari agütsütsü aser legspinner Mitchell Swepson o offspinner Nathan Lyon nata team nung züingoksemogo.

T20 World Cup final nung

Australia team takok dangi anisang Mitch Marsh all rounder ama team nung mezüingoksem aser asayar shimertemi Cameron Green ang shimtsü telemtetba agi.

Ajisüaka Marsh A squad nung züingoksemogo aser iba ajanga taruba ita tetenzüklen trial match asayaba mapang Test asaya nung pa asayaba yimya sayutsü atema maongka agütsüogo.

Australia Test squad: David Warner, Marcus Harris, Marnus Labuschagne, Steve Smith, Travis Head, Usman Khawaja, Cameron Green, Tim Paine (captain), Pat Cummins, Mitchell Starc, Josh Hazlewood, Nathan Lyon, Jhye Richardson, Michael Neser, Mitchell Swepson.

Australia A: Sean Abbott, Ashton Agar, Scott Boland, Alex Carey, Henry Hunt, Josh Inglis, Nic Maddinson, Mitch Marsh, Matthew Renshaw, Mark Steketee, Bryce Street.



Azadi Ka Amrit Mahotsav amungba nungtem nung ayongzükba BRO Motorcycle Expedition' team ka Bodhbarnü Dimapur tonga aruogo. Iba team nung biker 20 densema lir. Iba sentong ya November 16 nü Arunachal Pradesh nung tenzük aser November 27 nü New Delhi nung tembangtsü.

Indonesia Masters: Srikanth, Kapila-Reddy nunger tanabuba round-i iogo

Bali, Yimpoksüi/November 17 (Agencies): Bodhbarnü Indonesia Masters Super 750 badminton tournament tebur kija asaya nung France nunger asayar Christo Popov den kanga toktepa asayaba sülen India nunger rongnungi nungtugu asayar Kidambi Srikanth-i asaya koka tanabuba round tongtetogo.

Taoba mapang world no 1 asayar Srikanth, shibai 2017 küm Jakarta nung Indonesia Open Super Series premier koka liasü, pai iba asayamung mezüingbuba asaya nung world no 71 Christo 21-18 15-21 21-16 agi koka liasü. Tena tsüingda asaya ghonda ka ser minute 15 asayaa liasü.

Srikanth tang jenjang 15buba nung lir aser pa taruba asaya Indonesia nunger sixth seed asayar Jonatan Christie den asayatsü akok.

Tarep temeyoktep asaya nung Dhruv Kapila aser N Sikki Reddy nati 21-11 22-20 agi Indonesia nunger tarep Praveen Jordan aser Melati Daeva Oktavianti na koka tanabuba round-i iogo.

Ajisüaka India nunger asayatem rongnungi Commonwealth Games champion Parupalli Kashyap tsükogo. Pai 10-21 19-21 agi Denmark nunger asayar Hans-Kristian Solberg Vittinghus mekoki liasü.

Daniil Medvedev ATP Finals semifinal tongogo



Yimpoksüi/November 17, 2021 (Agencies): Defending champion Daniil Medvedev-i, 2018 champion Alexander Zverev koka ATP Finals semifinals-i iogo.

Kasa mapang nung Italy nunger külem asayar Matteo Berrettini melenba sülen Jannik Sinner-i Hubert Hurkacz straight set nung kokogo aser paa semi-i aitsü maongka lir.

Medvedev shibai September ita U.S. Open koka mezüingbuba Grand Slam kokogo, pai iba asaya ghonda ana ser tesadang nung 6-3, 6-7 (3), 7-6 (6) agi Zverev madak takok ngua liasü.

"Teti bilemettsüba asaya ka liasü," ta Medvedev-i ashi.

"Tie breaker asaya nung pa 4-2 agi tejakdang liasü aser pai ace ka ana ora asaya atemtsü ta bilema liasü. Iba sülen 6-4 agi ni timba aküm aser tang ya kü mapang ta bilem. Maneni point 6-6 aküm koba jangrademtsüka liasü. Asaya indang ashitsü aika mali saka jangrademtsüka liasü," ta pai ashi.

Red Group nung Medvedev temaba jenjang nung lir aser Berrettini tugatokba sülen pa semifinal-i aitsü jangaogo. Deobarnü Zverev den asayaba mapang Berrettini yirur tugatok. Pai Mongolbarnü

training nung shilem agidang saka makokba sülen pa Sinner-i melena liasü.

Asaya nung Medvedev-i ace 14 aser Zverev-i 18 oteta liasü.

Medvedev-i tetenzük nungi kanga meranga asaya aser pai serve asüba mezüingbuba game ana nung break points asem tashi kümzüktet aser Zverev indang serve break süa pa 3-0 agi tejakdang aküm. Iba sülen pai asaya ayong ayonga akok.

Tanabuba set nung Medvedev-i pa indang service game pongu nung point ana dang monguteti asaya akoktsü imlaa liasü, ajisüaka Zverev-i break points asem tashi kümzükteta tiebreaker asayatsüsa aküm, koba pai koka liasü.

Deciding set nung Medvedev-i break point ka kümzüka Zverev nokdang aser tiebreaker nung pa atema tasembuba match point anguba sülen pai asaya akok.

Group asaya tatembangbuba nung Medvedev aser Sinner na asayatsü aser Italy nunger asayar ya semifinal-i aitsü maongka lir.

Sinner-i Hurkacz den asaya 6-2, 6-2 agi ayong ayonga koka liasü. Pai set anaprongla nung Hurkacz indang serve anabenben break süa liasü.

BILEMDANGANG

"Pei kechi inyakteter aji bendanga agüja inyakang."